



ATASSUT

7. 10. 2020

Siverth K. Heilmann

UKA 2020/107

**Nunatsinni sanaartornikkut suliffeqarfiutilinnut mikisunut angivallaanngittunullu sanaartornikkut aningaasalersuutitigullu annertunerusumik akuutitsisinnaanerit pillugu apeqquteqaat aallaavigalugu oqallinnissamik siunnersuut:**

(inatsisartunut ilaasortaq Doris J. Jakobsen, Siumut)

Siullermik apeqquteqaat aallaavigalugu oqallisissiaqartoq inatsisartuni ilaasortaq Doris J. Jakobsen qujanaq oqallisissianut soqutiginarlut, imatullu Atassummiit naatsumik oqaaseqarfigissavarput.

Oqallisissiaqartup tunngavilersornermini aallarniutigaa 1950-ikkunni sanaartorneq annertuumik ingerlanneqarsimanera nangittumillu 60-sikkunniit 90-sikkut angullugit sakkortuumik ingerlanneqarsimanera. Oqaatigineqartullu ilagaat, Nunatsinni sanaartorneq nunatta anersaavanik anersaaqanngitsut ilagilluinnaraat, sualummik avataaneersut aningaasarsiupallannissaannarmik eqqarsarlutik sanaartukkaminnik ingerlatitsisimanerarlugit, tamatumalu kingunerisaasa ilagigaat nunatsinni sannarlugarpassuaqarsimanera.

Kingusinaartoqanngisaannarpoq nassuerutigisinnaassallugu, ukiuni qulaani taaneqartuni sanaartornerup aallartisarnerani, naalaagaaffeqatitta Qallunaat Nunaanniit annertoorujussuarmik sanaartornermut aningaasaliinerit ilinniartitsinernullu pisussaaffittut ajunngivissumik ingerlannikummassuk. 1990-sikkulli sioqqullugit Nunarput namminiilivikkiartornermini akisussaaffinnik tigusiumalluni politikikkut isummertarsimanerit inissiarpassuit akisussaaffigiumallugit tigoqqakkatsinnut ilaapput, iluarsartuussinissamulluunniit aningaasalersuisinnaanermut amikkisaarutigineqartaqisunillu oqariartuutaasartut Atassummiit innersuussutigiinnassavagut. Taamaammat taamanikkut, kikkut sannarlussimanerannik iluanaarniapilussinnaanerannillu oqallisissiaqartumiit oqariartuutigineqartut tamakkiisutut Atassummiit isiginngilagut.

Oqallisissiaqartoq aaqqiiniutaasinnaasunik, ukiuni aggersuni illuanut saatitsiniartariaqarnermik oqarnera isumaqatigaarput. Naalakkersuinikkut inatsisartunilu inatsisiliortarnitsinni aalajangiisarnigut, Nunatta siamasinnerusumik ineriartornissaanut namminersortullu atugaasa inerisarneqarnissaanut siunnerfeqaraluartilluta, suli takussutissaannaavoq aqagunnguaq sanaartornermi neqeroortitsisarneq, Illuliortitsisarnernut aningaasalersuisarnerit pillugit Naalakkersuisut saqqummiussaqaarnerat aammaarluta nalilersoqqittussaavarput. Oqaatigilaareersinnaavarali sannarlunnaasarnerit allatigullu akitsoraluttuinnartumik tunngavilersuuteqarnigut tusarliukkumaaratsigit.

Oqallisissiaqartup apeqquterpaalunnik saqqummiussuineri akissuteqarfigerusukkaluaqalugit, Atassummiit oqaatigiinnarusupparput, ila qasseriartutami qinikkatut sulinitsinni siunnersuuteqartup



qaqitai eqqartortakkagut iluarsivigeqqullugillu kissaatigisartakkagut partiinik tikkuartakkagut tusaaneqassagamik.

Taamatut naatsumik oqaaseqarluta oqallisissiaqartumut qujavugut, sanaartorerulli iluani aqagumut aalajangiiffisassamut saqqummiunneqartussanut qilanaarpugut.

Qujanaq